

Susret Visokog predstavnika sa članovima Transparency International

Predstavnici organizacije Transparency International su danas posjetili Sarajevo kako bi se sastali sa međunarodnim i domaćim dužnosnicima uključenim u borbu protiv korupcije.

Cilj posjete je bio prikupljanje informacija o mogućem otvaranju podružnice Transparency International u Bosni i Hercegovini.

Transparency International je nevladina organizacija čije su aktivnosti usmjerene na povećavanje odgovornosti organa vlasti i ograničavanje korupcije na međunarodnom i lokalnom nivou. Organizacija ne istražuje niti imenuje pojedinačne slučajeve, već se koncentriše na spriječavanje korupcije putem izgradnje sistema za borbu protiv korupcije. Stav Transparency International je da je borba protiv korupcije jedino moguća uz angažman države, građanskog društva i privatnog sektora. Cilj podružnice je da okupi osobe visokih moralnih kvaliteta iz građanskog društva, poslovnog sektora i organa vlasti, kako bi zajedno proveli reforme sistema. Podružnica će biti nezavisna i pod rukovodstvom domaćih kadrova.

Posjeta Transparency International je bila izuzetno produktivna. Lokalni organi vlasti su izrazili svoje opredjeljenje ka poduzimanju anti-korupcionih inicijativa, a međunarodna zajednica svoju spremnost da ponudi tehničku podršku ovim aktivnostima. Transparency International smatra da je krajnje vrijeme da se uspostavi nezavisna, nestranačka i građanska organizacija, koja će donijeti kredibilitet nastojanjima da se donesu bolji zakoni i reforme.

Visoki predstavnik Wolfgang Petritsch pozdravlja posjetu Transparency International i podržava formiranje podružnice u

BiH u cilju postavljanja lokalnog građanskog "stražara" u ovom procesu. Ovo će podstaći organe vlasti da poduzmu mjere u borbi protiv korupcije, kao i ukazati građanima na štetnost korupcije za svakog pojedinca i čitavu zemlju, te omogućiti praćenje i informisanje javnosti o učinku mjera koje lokalne institucije poduzimaju u borbi protiv korupcije. Na sastanku sa Transparency International Visoki predstavnik je istakao da bi formiranje podružnice predstavljalo učvršćivanje koncepta lokalne odgovornosti.